

დამტკიცებულია დირექტორის 2019 წლის 24 ივნისის N9 ბრძანებით
ცვლილებები განხორციელდა დირექტორის 2021 წლის 28 მაისი N01/28 ბრძანებით
ცვლილებები განხორციელდა შპს გეოგლობალ აკადემიის დირექტორის 2025 წლის 25 აგვისტოს N15548 ბრძანებით
დანართი 5

**შპს „გეოგლობალ აკადემია“
ეთიკის კოდექსი
და
დისციპლინარული პასუხისმგებლობის ნორმები**

2021

მარნეული

თავი I. ზოგადი დებულებანი

მუხლი 1. შესავალი დებულებანი

1. შპს „გეოგლობალ აკადემია“ (შემდგომში - აკადემია) წარმოადგენს პროფესიულ საგანმანათლებლო დაწესებულებას, რომელშიც სტუდენტების/მსმენელების, მასწავლებლების/პროგრამის განმახორციელებლებისა და ადმინისტრაციული პერსონალის თანამშრომლობით იქმნება პროფესიული განათლებისა ერთიანი სივრცე. ერთიანი სივრცე ემყარება სამ პრინციპს: ა) აკადემიურ თავისუფლებას; ბ) სინდისის თავისუფლებას; გ) არჩევანის თავისუფლებას.
2. აკადემია თავისი არსით მნიშვნელოვან როლს ასრულებს დემოკრატიული და ღია საზოგადოების ჩამოყალიბებაში, რისთვისაც საჭიროა ეთიკური ნორმების დაცვა.
3. ეთიკის კოდექსი (შემდგომში - კოდექსი) წარმოადგენს აკადემიის თანამშრომლებისა და სტუდენტების/მსმენელების ეთიკური პრინციპების, ღირებულებებისა და ქცევის ფორმულირებას.
4. კოდექსი მიზნად ისახავს დაეხმაროს თანამშრომლებსა და სტუდენტებს/მსმენელებს იმ ეთიკური საკითხების გადაჭრასა და დადგენაში, რომლებიც შეიძლება წამოიჭრას მათი მუშაობისა თუ სწავლის პერიოდში. აღნიშნული სისტემა მიმართულია ასევე კოლეგებთან, სტუდენტებთან/მსმენელებთან, აკადემიასთან და ეროვნულ თუ საერთაშორისო გაერთიანებებთან ურთიერთობების დარეგულირებისაკენ.

მუხლი 2. სამართლებრივი საფუძვლები

1. ამ კოდექსის სამართლებრივი საფუძველია საქართველოს კონსტიტუცია, „პროფესიული განათლების შესახებ“ საქართველოს კანონი, სხვა ნორმატიული აქტები, აკადემიის დებულება და შინაგანაწესი.

მუხლი 3. კოდექსის მოქმედების სფერო

- 1.ეს კოდექსი ვრცელდება აკადემიის პროფესიულ სტუდენტებზე/მსმენელებზე, თანამშრომლებზე და აწესრიგებს მათი ქცევის წესებს აკადემიის სწავლის და მოღვაწეობის მთელი პერიოდისათვის.
2. ამ კოდექსის მიზნებისათვის სტუდენტად/მსმენელად მიიჩნევა:
 - 2.1. პირი, რომელიც „პროფესიული განათლების შესახებ“ საქართველოს კანონით, სხვა ნორმატიული აქტების და აკადემიის მიერ განსაზღვრული წესით სწავლობს აკადემიაში პროფესიული საგანმანათლებლო პროგრამაზე.
 - 2.2. პირი რომელიც სწავლობს პროფესიული მომზადების/პროფესიული გადამზადების პროგრამაზე;
 - 2.3. პირი, რომელიც სწავლობს აკადემიის სასერტიფიკატო კურსზე, სადაც სწავლის დასრულების შემდეგ გათვალისწინებულია შესაბამისი სერტიფიკატის გაცემა;
 - 2.4. პირი, რომელიც აკადემიაში გადის ტრენინგს.

თავი II. პროფესიულ სტუდენტთა/მსმენელთა ეთიკის ნორმები

მუხლი 4. კოდექსის ძირითადი პრინციპები

1. აკადემიის ყველა სტუდენტი/მსმენელი თანაბრად სარგებლობს საქართველოს კანონმდებლობითა და აკადემიის საქმიანობის მარეგულირებელი დოკუმენტებით განსაზღვრული მისთვის მინიჭებული უფლებებით.
2. სტუდენტი/მსმენელი იზიარებს აკადემიის ეთიკის კოდექსით გათვალისწინებულ ღირებულებებს და იცავს ამ კოდექსით დადგენილ ნორმებს.
3. სტუდენტი/მსმენელი აღიარებს აკადემიის უფლებას, ეთიკის კოდექსის დარღვევის შემთხვევაში, განიხილოს მისი დისციპლინური პასუხისმგებლობის საკითხი და ამასთან, იღებს ვალდებულებას, შეასრულოს ამ საკითხთან დაკავშირებით მიღებული გადაწყვეტილება.

მუხლი 5. სტუდენტთა/მსმენელთა ეთიკის წესები

1. ეს კოდექსი სტუდენტისათვის/მსმენელისათვის ადგენს ქცევის საერთო და სასწავლო პროცესთან დაკავშირებულ წესებს.

მუხლი 6. სტუდენტთა/მსმენელთა ეთიკის საერთო წესები

1. სტუდენტისთვის/მსმენელისთვის შეუფერებელ და არაეთიკურ ქცევად ჩაითვლება:
 - 1.1. სასწავლო პროცესის მიმდინარეობისათვის ხელის შეშლა (ლექციაზე ხმაური, მობილური ტელეფონით სარგებლობა, დერეფანში აურზაური, ბილწისიტყვაობა და სხვა);
 - 1.2. მოწვევა ნებადართული ტერიტორიის ფარგლებს გარეთ;
 - 1.3. ალკოჰოლური სასმელების აკადემიის შენობაში შემოტანა, გავრცელება ან/და გამოყენება;
 - 1.4. აკადემიის ტერიტორიაზე აზარტული თამაშები;
 - 1.5. ინვენტარით სარგებლობის წესის დარღვევა (მერხებზე წარწერების გაკეთება, კომპიუტერების, ლაბორატორიული მოწყობილობების, სასწავლო ავეჯისა და ინვენტარის დაზიანება);
 - 1.6. აკადემიის ტერიტორიის დანაგვიანება და იერსახის დამახინჯება/დაზიანება;
 - 1.7. ნარკოტიკული ან/და ფსიქოტროპული საშუალებების აკადემიის შენობაში შემოტანა, გავრცელება ან/და გამოყენება;
 - 1.8. ფეთქებადი და აალებადი ნივთებისა და ნივთიერებების აკადემიის შენობაში შემოტანა ან/და გავრცელება, რომლებიც ხანძრის ან/და აფეთქების რეალურ საფრთხეს ქმნიან;
 - 1.9. ძალადობა, ფიზიკური ან/და სიტყვიერი შეურაცხყოფის მიყენება სხვა სტუდენტები/მსმენელების ან თანამშრომლებისათვის.

მუხლი 7. სასწავლო პროცესთან დაკავშირებული წესები

1. სტუდენტისთვის/მსმენელისთვის შეუფერებელ და არაეთიკურ ქცევად ჩაითვლება შემდეგი აკადემიური სიყალბე:
 - 1.1. გადაწერა სხვა სტუდენტის/მსმენელის ნამუშევრიდან, ან გამოყენება ისეთი დამხმარე მასალის რომელიც არ არის დაშვებული შეფასების პროცესში.
 - 1.2. სხვა პირის ნამუშევრის, როგორც საკუთარის წარმოჩენა.

- 1.3. ხელის შეშლა სხვა სტუდენტებისათვის/მსმენელებისათვის სწავლის პროცესში საჭირო რესურსების დამალვით, მოპარვით ან განადგურებით;
- 1.4. სხვა სტუდენტისათვის/მსმენელისათვის აკადემიური სიყალბის ჩადენაში ხელის შეწყობა;
- 1.5. ინდივიდუალური დავალების ჯგუფურად მომზადება ან ერთი პირის მიერ მომზადებული დავალების ჯგუფურ ნამუშევრად წარმოჩენა;
- 1.6. სხვა სტუდენტის/მსმენელის ნაცვლად შეფასების პროცესზე შესვლა, ან სხვა პირის შეგზავნა;
- 1.7. შეფასების პროცესის შესახებ კონფიდენციალური ინფორმაციის მოპოვება ან/და გავრცელება;
- 1.8. სხვა სტუდენტის/მსმენელის ნამუშევრის მოპარვა, განადგურება, შეცვლა;
- 1.9. მონაცემების გაყალბება;
- 1.10. შეფასების მიღების მცდელობა გამომცდელზე მუქარი ფიზიკური ან ფსიქოლოგიური ზემოქმედებით, მოტყუებით, თაღლითობითა თუ სხვა დაუშვებელი ხერხებითა და ქმედებით.

მუხლი 8. დისციპლინური პასუხისმგებლობის ზომების შესაძლო სანქციები

1. დისციპლინური ღონისძიებების გატარების საკითხის აღძვრისათვის ეთიკის საერთო და სასწავლო პროცესთან დაკავშირებული წესების დარღვევის ფაქტებზე სტუდენტის/ მსმენელის მიმართ დისციპლინური ღონისძიებების გატარების საკითხის აღძვრა შეუძლია აკადემიის ნებისმიერ თანამშრომელს.
2. ეთიკის საერთო და სასწავლო პროცესთან დაკავშირებული წესების დარღვევისათვის:
 - 2.1. სტუდენტს/მსმენელს შეიძლება მიეცეს ზეპირი გაფრთხილება;
 - 2.2. სტუდენტს/მსმენელს შეიძლება მიეცეს წერილობითი გაფრთხილება;
 - 2.3. სტუდენტს/მსმენელს შეიძლება შეუწყდეს სტატუსი.
3. სტუდენტის/მსმენელის მიერ საქართველოს კანონმდებლობის მიხედვით გათვალისწინებული დასჯადი ქმედების ჩადენისას, აკადემია დაუყოვნებლივ მიმართავს პოლიციას.

მუხლი 9. დისციპლინური კომისია

1. იმის გადასაწყვეტად, თუ რა სანქცია შეიძლება შეეფარდოს ამ კოდექსით გათვალისწინებული წესების დამრღვევ სტუდენტს/მსმენელს, იქმნება დისციპლინური კომისია.
2. დისციპლინური კომისია იქმნება დირექტორის ბრძანებით;
3. დისციპლინური კომისიის წევრთა რაოდენობა არის კენტი და შედგება არანაკლებ 3 და არა უმეტეს 5 წევრისაგან.
4. დისციპლინურ კომისიაში შედიან:
 - 4.1. დირექტორის მოადგილე;
 - 4.2. ერთ-ერთი სტუდენტი/მსმენელი;
 - 4.3. პროფესიული მასწავლებელი ან ადმინისტრაციის თანამშრომელი.
5. ეთიკის კოდექსის დარღვევების განხილვა მიმდინარეობს კომისიის სხდომებზე. სხდომა უფლებამოსილია, თუკი სხდომას ესწრება წევრების ნახევარი მაინც.
6. დისციპლინურ კომისიაზე სტუდენტს/მსმენელს უნდა მიეცეს შესაძლებლობა წარმოადგინოს საკუთარი ახსნა-განმარტება.
7. გადაწყვეტილება მიიღება სხდომაზე დამსწრეთა უმრავლესობით.

8. დისციპლინური კომისია საკუთარი გადაწყვეტილების შესახებ აცნობებს დირექტორს.

მუხლი 10. დირექტორი

1. დირექტორს გამოაქვს გადაწყვეტილება, იმის შესახებ, თუ რა სანქცია შეიძლება შეეფარდოს ამ კოდექსის დამრღვევ სტუდენტს/მსმენელს.
2. საკითხის განხილვისას სტუდენტს/მსმენელს უნდა მიეცეს შესაძლებლობა წარმოადგინოს საკუთარი ახსნა-განმარტება. სტუდენტის/მსმენელის წერილობითი მოთხოვნის შემთხვევაში საკითხი განხილულ უნდა იქნეს საჯარო სხდომაზე.
3. განხილვის შედეგად დირექტორი იღებს საბოლოო გადაწყვეტილებას სტუდენტისათვის/მსმენელისთვის დისციპლინური პასუხისმგებლობის დაკისრების შესახებ.
4. დისციპლინური კომისიის გადაწყვეტილების ვერ მიღების შემთხვევაში დირექტორმა უნდა მიმართოს დისციპლინარულ კომისიას საქმის თავიდან განხილვის შესახებ.
5. გადაწყვეტილება დისციპლინური პასუხისმგებლობის დაკისრების შესახებ შედის სტუდენტის/მსმენელის პირად საქმეში.

თავი III. პროფესიული განათლების მასწავლებლების/პროგრამის განმახორციელებლებისა და ადმინისტრაციაში დასაქმებული თანამშრომლების ეთიკის ნორმები

მუხლი 11. პროფესიული მასწავლებლების/პროგრამის განმახორციელებლების ეთიკის ნორმები

1. პროფესიული განათლების მასწავლებლები/პროგრამის განმახორციელებლები აკადემიის ძირითადი საქმიანობის წარმმართველი ძალაა. ისინი ვალდებული არიან სისტემატურად იღვწოდნენ პედაგოგიური და პროფესიული დონის ასამაღლებლად. ამასთან, მათ ეკისრებათ მოვალეობა მიიღონ აქტიური მონაწილეობა აკადემიის საზოგადოებრივ თუ საორგანიზაციო საქმიანობაში.
2. პროფესიული განათლების მასწავლებლებმა/პროგრამის განმახორციელებლებმა სწავლების პროცესი უნდა წარმართონ აკადემიის პროფესიული საგანმანათლებლო პროგრამების/პროფესიული მომზადება/პროფესიული გადამზადების პროგრამის შესაბამისად.
3. პროფესიული განათლების მასწავლებლებმა/პროგრამის განმახორციელებლებმა არ უნდა დაავიანონ ლექციაზე/პრაქტიკულ მეცადინეობაზე, მეცადინეობა არ უნდა დასრულდეს დროზე ადრე; არ უნდა გააცდინონ ლექცია საპატიო მიზეზის გარეშე.
4. პროფესიული განათლების მასწავლებლებმა/პროგრამის განმახორციელებლებმა უნდა უზრუნველყონ ობიექტური და გამჭვირვალე შეფასება, დაუშვებელია სტუდენტების/მსმენელების განსხვავება.
5. პროფესიული განათლების მასწავლებლებს/პროგრამის განმახორციელებლებს ევალებათ აკადემიის სოციალურ და სასწავლო ღონისძიებებში მონაწილეობის მიღება.
6. ნებისმიერი სახის კომუნიკაცია პრესასთან ან მედია ორგანოებთან აკადემიის სახელით წინასწარ უნდა იქნეს შეთანხმებული აკადემიის უფლებამოსილ პირებთან.
7. პერსონალმა უნდა დაიცვას აკადემიის სახელი და რეპუტაცია როგორც სამსახურში ყოფნის დროს, ისე მის გარეთ.
8. აკადემიასთან შრომითი ურთიერთობის გაწყვეტის შემთხვევაში, პროფესიული განათლების მასწავლებლები/პროგრამის განმახორციელებლები ვალდებული არიან აკადემიის ოფიციალურ ორგანოს მიაწოდოს იმ მომხმარებლის სახელები და პაროლები რომელიც

გამოიყენებოდა აკადემიის ოფიციალურ ინფორმაციის პლატფორმაზე წვდომისთვის (სოციალური მედია, მონაცემთა ბაზა, კორპორატიული ელ-ფოსტა და ა.შ.).

9. პროფესიული განათლების მასწავლებლების/პროგრამის განმახორციელებლების არასათანადო საქციელმა შეიძლება გამოიწვიოს დისციპლინარული საჩუქის დაცისრება.

10. პროფესიული განათლების მასწავლებლებმა/პროგრამის განმახორციელებლებმა თავი უნდა შეიკავონ აკადემიის ფარგლებს გარეთ ისეთ საქმიანობაში ჩართვისა, თუ ვალდებულებების აღებისაგან, რაც ხელს შეუშლის მათი მოვალეობების სრულფასოვნად განხორციელებას.

11. პერსონალმა დანიშნულებისამებრ და ეფექტიანად უნდა გამოიყენონ აკადემიის შენობა, ტექნიკა, აღჭურვილობა და სხვა რესურსები საქმიანობის სრულად განხორციელებლად.

12. პროფესიული განათლების მასწავლებლები/პროგრამის განმახორციელებლები სამართლიანად და პატივისცემით უნდა მოეპყრონ ერთმანეთს, ყველა თანამშრომელსა და სტუდენტს/მსმენელს.

მუხლი 12. კოლეგებთან ურთიერთობა

1. პროფესიული განათლების მასწავლებლების/პროგრამის განმახორციელებლების მიერ ეთიკური ნორმების დარღვევისათვის დაწესებულია აკადემიის შინაგანაწესით დადგენილი ზომები.

2. პროფესიული განათლების მასწავლებლებმა/პროგრამის განმახორციელებლებმა პატივი უნდა სცენ კოლეგის აკადემიურ დამოუკიდებლობას, სამართლიანად და ობიექტურად უნდა შეაფასოს მისი საქმიანობა; კოლეგის კრიტიკა უნდა იყოს კონსტრუქციული; არ უნდა გააკეთოს უხეში და მიუღებელი კომენტარები კოლეგის სწავლების მეთოდებზე, დაუშვებელია კოლეგის დამცირება, შეურაცხყოფა ან ანონიმურად დადანაშაულება.

3. პროფესიული განათლების მასწავლებლებმა/პროგრამის განმახორციელებლებმა თანაბრად და სამართლიანად უნდა გადაინაწილონ აკადემიასთან დაკავშირებული მოვალეობები, აქტიური დახმარება უნდა გაუწიონ კოლეგებს პროფესიული განვითარების საქმეში.

მუხლი 13. ადმინისტრაციის თანამშრომლებთან ურთიერთობა

1. პროფესიული განათლების მასწავლებლებსა/პროგრამის განმახორციელებლებსა და ადმინისტრაციის თანამშრომლებს შორის უნდა არსებობდეს პატივისცემაზე და სამართლიანობაზე დაფუძნებული ურთიერთობა. რომელიმე მხრიდან დაუშვებელია დისკრიმინაცია.

2. პროფესიული განათლების მასწავლებლებმა/პროგრამის განმახორციელებლებმა არ უნდა გამოიყენონ ადმინისტრაციის თანამშრომლები საკუთარი გამორჩენის მიზნით, არ უნდა მოითხოვონ კანონით გაუთვალისწინებული შეღავათები და დათმობები, რაც ადმინისტრაციის თანამშრომლებს ეთიკური დილემის წინაშე დააყენებს.

მუხლი 14. ადმინისტრაციის თანამშრომლები

1. ადმინისტრაციის თანამშრომლების მოვალეობაა აკადემიაში შექმნან სასწავლო საქმიანობისა და პროფესიული განვითარებისთვის აუცილებელი მორალური, ფინანსურ-ეკონომიკური და საყოფაცხოვრებო გარემო.

2. ადმინისტრაციის თანამშრომლები პატივს უნდა სცემდნენ აკადემიასა და მის ტრადიციებს, თანამშრომლებსა და სტუდენტებს/მსმენელებს უნდა მოეპყრონ სამართლიანად და

პატივისცემით. ადმინისტრაციის თანამშრომლებმა უნდა შეიმუშაონ და განახორციელონ ისეთი პოლიტიკა, რომელიც გამორიცხავს თანამშრომლებისა და სტუდენტების/მსმნელების დისკრიმინაციას სქესისა და ასაკის, რასობრივი, ეთნიკური, პოლიტიკური ან რელიგიური კუთვნილების საფუძველზე.

3.ადმინისტრაციის თანამშრომლების საქმიანობა უნდა ეფუძნებოდეს ეთიკის მაღალ სტანდარტებს, კეთილსინდისიერებას და პატიოსნებას; ხელს უწყობდეს საზოგადოებაში აკადემიის სახელისა და ავტორიტეტის განმტკიცებას. ამ მიზნით, ადმინისტრაციის თანამშრომლები უნდა ემორჩილებოდნენ აკადემიის მიერ დადგენილ წესებს, პროცედურებსა და არსებულ კანონმდებლობას.

4.ადმინისტრაციის თანამშრომლებმა, აკადემიის საჭიროებისათვის, ეფექტიანად უნდა გამოიყენონ აკადემიის ქონება, სამუშაო დრო, ინტელექტუალური შესაძლებლობები და სხვა რესურსები.

5.ადმინისტრაციის თანამშრომლებმა არ უნდა გაამჟღავნოს პროფესიული საქმიანობის დროს მიღებული კონფიდენციალური ინფორმაცია, გარდა ლეგიტიმური საჭიროებისა.

6.ადმინისტრაციის თანამშრომლების მიერ ეთიკური ნორმების დარღვევისათვის გათვალისწინებულია აკადემიის შინაგანაწესით დადგენილი ზომები.

მუხლი 15. ეთიკის დარღვევის სახეობები

1. პერსონალს ეკრძალება სხვისი ინტელექტუალური შრომის შედეგის ტექსტის, იდეის, კონცეფციის, ვიზუალური ან აუდიო მასალის, ნებისმიერი სახის მონაცემების მითვისება და გავრცელება ავტორის მიუთითებლად.

2.პერსონალს ეკრძალება მონაცემებისა და ინფორმაციის გაყალბება.

3.აკადემია ვალდებულია დროული რეაგირება მოახდინოს პერსონალის ქცევის საერთო წესების ყველა გამოვლენილ დარღვევაზე.

4. ეთიკის დარღვევის აღმოჩენის შემთხვევაში განმცხადებელი ვალდებულია მიმართოს აკადემიის დირექტორს, რომელიც ქმნის ეთიკის კომისიას 5-7 წევრით. კომისია განიხილავს დაფიქსირებულ დარღვევას.

5.დარღვევის დადასტურების შემთხვევაში, დარღვევის სიმძიმის გათვალისწინებით, აკადემიის მიერ გამოყენებული იქნება შინაგანაწესით გათვალისწინებული დისციპლინური სახდელი.

თავი IV. დასკვნითი ნაწილი

მუხლი 16. დასკვნითი დებულებები

1.პიროვნების პასუხისმგებლობა იზრდება ამ კოდექსის ნორმების განმეორებითი დარღვევის ან დისციპლინური გადაცდომის ხარისხის პროპორციულად.

2.თანამშრომლების მიმართ დისციპლინური პასუხისმგებლობის ზომის შეფარდება ხდება დირექტორის ბრძანებით. მიღებული გადაწყვეტილება დაინტერესებულ პირს უნდა ეცნობოს წერილობით.

3. ეთიკის კოდექსი მტკიცდება აკადემიის დირექტორის ბრძანებით;

4.ეთიკის კოდექსის საჯაროა და გამოქვეყნებულია აკადემიის ვებ-გვერდზე.

5.ეთიკის კოდექსში ცვლილებების ან/და დამატებების შეტანა ხდება აკადემიის დირექტორის ბრძანების საფუძველზე.